

## 春江花月夜

张若虚

### 【原文】

春江潮水连海平，海上明月共潮生。

滟滟[1]随波千万里，何处春江无月明。

江流宛转绕芳甸，月照花林皆似霰[2]。

空中流霜不觉飞，汀上白沙看不见[3]。

江天一色无纤尘，皎皎空中孤月轮[4]。

江畔何人初见月，江月何年初照人。

人生代代无穷已[5]，江月年年只相似。

不知江月待何人，但见长江送流水。

白云一片去悠悠，青枫浦[6]上不胜愁。

谁家今夜扁舟子？何处相思明月楼[7]。

可怜楼上月徘徊[8]，应照离人妆镜台。

玉户帘中卷不去，捣衣砧上拂还来[9]。

此时相望不相闻，愿逐月华[10]流照君。

鸿雁长飞光不度，鱼龙潜跃水成文[11]。

昨夜闲潭[12]梦落花，可怜春半不还家。

江水流春去欲尽，江潭落月复西斜。

斜月沉沉藏海雾，碣石潇湘无限路[13]。

不知乘月几人归，落月摇情满江树[14]。